
Energi Norges tilrådte tilknytingsvilkår for næringskunder m.m.

§ 1 GENERELT OM TILKNYTINGSVILKÅR

Desse tilknytingsvilkåra gjeld i kontraktsforholdet mellom nettselskap og eigar av elektriske anlegg (anleggseigar) som ikkje er forbrukar etter definisjonen av forbrukar i § 1 i lov om forbrukerkjøp av 21. juni 2002 nr 34.

Tilknytingsvilkåra regulerer forholdet mellom nettselskapet og eigaren av det elektriske anlegget som skal knytast til, eller er tilknytt, distribusjonsnett eller regionalnett. Bruken av distribusjonsnett eller regionalnett til uttak av kraft er regulert av nettleigeavtalen mellom nettselskapet og brukaren av det elektriske anlegget (dvs. nettkunden).

Dersom det er tvil om korleis ein skal forstå omgrep og uttrykk som er brukte i desse vilkåra, skal – med mindre noko anna kjem fram av samanhengen – definisjonane i den vedlagde definisjonslista leggjast til grunn.

§ 2 BESTILLING OG GODKJENNING AV TILKNYTING

§ 2-1 *Avtaleforholdet*

Avtaleforholdet består av desse tilknytingsvilkåra, tilknytings- og nettleigeavtale for næringskunde m.m. med eventuelle individuelle vilkår, gjeldande nettleigevilkår og dei føresetnadene som er lagde til grunn for tilknytninga, jf. § 2-4.

§ 2-2 *Bestilling og utføring av tilknytning*

Bestilling og utføring av tilknytning til distribusjonsnett skal skje i samsvar med reglane og rutineane til nettselskapet eller «Regler for tilknytning av elektriske anlegg i fordelingsnett», jf. Energi Norge AS Publikasjon nr 101-2002.

Bestilling og utføring av tilknytning av anlegg for uttak frå regionalnett skal skje i samsvar med reglane og rutineane til nettselskapet.

§ 2-3 *Stadfesting av bestilling*

Nettselskapet melder skriftleg tilbake til anleggseigar, eller representanten for anleggseigar, om bestillinga er godkjend med dei dataa som er innmelde, eller om det blir kravd ytterlegare informasjon. Meldinga skal givast elektronisk. Dersom bestillinga ikkje blir godkjend, skal det grunnvist sakleg og skriftleg.

Saman med tilbakemeldinga frå nettselskapet til anleggseigar skal det leggjast ved eit eksemplar av desse tilknytingsvilkåra. Alternativt kan nettselskapet vise til stad der tilknytingsvilkåra m.m. er tilgjengelege, til dømes på heimesida til nettselskapet på Internett.

§ 2-4 Tilknytingsføresetnader

Eit elektrisk anlegg blir knytt til distribusjonsnettet eller regionalnettet til nettselskapet i samsvar med dei føresetnadene som er gitt i den skriftlege tilbakemeldinga frå nettselskapet til anleggseigaren, jf. § 2-3.

Tilknyttinga skal dimensjonrast på bakgrunn av eit energi- og effektbudsjett som partane er samde om.

Føresetnaden for tilknyttinga kjem fram av eige vedlegg til desse vilkåra. Eventuelle rettar som nettselskapet har skaffa seg over den faste eigdommen til anleggseigaren, kan tinglysast på nettselskapet sin kostnad.

Dersom føresetnadene for tilknytting av eit anlegg blir vesentleg endra eller viser seg å ikkje vere korrekte, kan nettselskapet krevje å få dekt dei meirkostnadene dette fører med seg, til dømes kostnader knytte til drift og vedlikehald som ikkje blir dekte av nettleiga.

§ 2-5 Overdraging av elektrisk installasjon/anlegg som er tilknytte nettet

Tilknytingsvilkåra gjeld for alle framtidige eigarar av det elektriske anlegget. Dersom eit elektrisk anlegg skiftar eigar, trer den nye eigaren inn i dei same rettane og pliktene som forjengaren sin, til dette høyrer dei rettane og pliktene som følgjer av desse tilknytingsvilkåra.

§ 2-6 Drift og vedlikehald av elektriske anlegg

Anleggseigar er ansvarleg for å byggje, drive og halde ved like det elektriske anlegget sitt i samsvar med dei lovene og forskriftene som til kvar tid gjeld. Oppstår det feil på anlegg,

skal anleggseigar straks kontakte autorisert el-entreprenør/nettselskap som gjer den nødvendige utbetringa/feilrettinga. Dersom anleggseigar har tilsett personale med nødvendig godkjenning, kan dei gjere dei nødvendige utbetringane/feilrettingane på anlegget til anleggseigar.

Nettselskapet, Direktoratet for samfunnstryggleik og beredskap (DSB)/Det lokale elektrisitetstilsynet (DLE) har i samsvar med dei lovene og forskriftene som til kvar tid gjeld, rett til uhindra og kostnadsfri tilgang til alle anlegga til anleggseigar som er knytte til nettet.

§ 2-7 Teieplikt

Nettselskapet skal ikkje levere frå seg personopplysningar om anleggseigar eller tilsette i verksemda til anleggseigar til utanforståande, unnateke når utlevering av opplysningar skjer

- a. med samtykke frå den opplysninga gjeld
- b. med heimel i lov eller i forskrift gitt med heimel i lov, eller
- c. som ledd i betalingsinnkrevjing osv. og elles når det ligg føre saklege grunnar for det

Nettselskapet har på same måten teieplikt om alle forhold som selskapet blir kjent med av teknisk eller økonomisk art som gjeld anleggseigar og verksemda hans/hennar, og som ikkje allereie er allment kjende.

§ 3 FRAMFØRING OG PLASSERING AV NETT

§ 3-1 Framføring av distribusjonsnett/stikkledning til eige bruk for anleggseigar

Nettselskapet skal utan å måtte yte vederlag eller erstatning få tilgang til å føre fram nødvendig distribusjonsnett og/eller stikkledning over grunneigedom som er eigd eller blir disponert av anleggseigar, for tilknytning av det elektriske anlegget til anleggseigar.

Nettselskapet avgjer korleis distribusjonsnett/stikkledning skal førast fram, til dette høyrer plassering av og art og dimensjon på nettet/leidningen. Nettselskapet skal likevel gjere framføringa til minst mogleg ulempe for anleggseigar eller andre som disponerer eigdommen. Nettselskapet påviser så langt som råd leiingstrasé, plassering av stolpar og anna utstyr for grunneigar/festar.

Anleggseigar har ikkje krav på erstatning for skadar og ulemper som stikkleidningen seinare kan føre til, unnateke dersom nettselskapet har vist aktløyse.

Ved bestilling av tilknytning har anleggseigar gitt rett og tilgang til å framføre leidningsnett for tilknytning av anleggseigaren sitt eige anlegg over grunn som anleggseigaren eig eller disponerer.

§ 3-2 Framføring av distribusjonsnett /stikkleidning til andre

Nettselskapet har rett til å framføre luftleidning eller jordkabel som distribusjonsnett eller stikkleidning over grunn som anleggseigar eig eller disponerer, til andre anleggseigarar/brukarar.

Framføring skjer utan vederlag til anleggseigar, men anleggseigar skal få høve til å uttale seg om leidningstrasé og plassering av stolpar og anna utstyr. Stikkleidning, distribusjonsnett og arbeidet med dette skal, med omsyn til økonomien og funksjonen til nettet, føre til minst mogleg ulempe for anleggseigar og andre som disponerer grunnen.

§ 3-3 Plassering av nettstasjonar

Ved tilknytning av større anlegg har nettselskapet rett til å krevje at anleggseigar avstår eit eige rom i bygning eller tomt til nettstasjon(ar). Plass som blir stilt til rådvelde, skal på førehand vere godkjend av nettselskapet.

Skal nettstasjonen berre betene anlegget til anleggseigaren, blir det ikkje betalt vederlag for avstått rom eller tomt for nettstasjon til anleggseigaren.

Nettselskapet har rett til å føre leidningar og kablar ut frå nettstasjonar for tilknytning av andre elektriske anlegg. Dette skal, med omsyn til funksjonen til nettet og økonomien, skje med minst mogleg ulempe for anleggseigar eller andre som disponerer eigedommen. Eventuelt vederlag for plassering av nettstasjon som skal betene anlegga til fleire anleggseigarar, blir fastsett som eit eingongsbeløp. Storleiken på vederlaget blir fastsett i samsvar med det som er vanleg i konsesjonsområdet til nettselskapet, og blir innarbeidd i eigen avtale.

§ 3-4 Særskilt om tilgang til leidningsnett for vedlikehald, fjerning av vegetasjon osv.

Nettselskapet har rett til å vedlikehalde leidningsnett/stikkledning, til dette høyrer også å fjerne vegetasjon som er komen eller kjem til å kome innanfor dei tryggleiksavstandane som er bestemte i forskrifter for dei ulike leidningstypene/spenningsnivåa. Det same gjeld for andre som har rett til å bruke leidningstraseen, blant desse eigar av telekommunikasjonsleidningar. Vedlikehald og fjerning av vegetasjon skal gjerast med minst mogleg ulempe for anleggseigar og andre som disponerer eigedommen, og nettselskapet pliktar å rydde opp etter seg og utbetre eventuelle terrengskadar etter slikt arbeid. Vedlikehald og fjerning av vegetasjon i samsvar med denne regelen gir ikkje anleggseigar eller andre som disponerer eigedommen, krav på erstatning eller vederlag.

§ 3-5 *Bruk av distribusjonsnett/stikkledning til andre formål*

Nettselskapet har rett til å bruke distribusjonsnett/stikkledning over grunn som anleggseigar eig, også til andre formål enn energioverføring, så lenge dette skjer utan unødvendig ulempe for anleggseigar og andre som disponerer eigedommen.

Nettselskapet har vederlagsfri rett til å bruke distribusjonsnett som er opparbeidd for å knyte til anlegget til ein anleggseigar, til å knyte til andre anleggseigarar dersom dette er tenleg med omsyn til funksjonen til nettet og økonomien.

§ 3-6 *Tilgang til distribusjonsnett og anlegg*

Anleggseigar skal gi nettselskapet og andre som nyttar leidningsnett/traseen, uhindra tilgang til eigedommen for å vedlikehalde og drifte nettet og tilknytingspunktet.

Nettselskapet skal til kvar tid ha uhindra og kostnadsfri tilgang til nettstasjonar, også når dei er plasserte i bygget til anleggseigaren.

§ 3-7 *Bruk av arbeidsmaskinar nær leidningsnett*

Bruk av arbeidsreiskapar nær, ved og under leidningsanlegg skal berre skje etter rettleiing frå nettselskapet slik at faren for ulykker og skadar på personar, leidningsanlegg og anna materiell kan minimerast. Ved arbeid på grunn som er eigd av eller blir disponert av anleggseigar, og som inneber at ein bruker anleggsreiskap nærare høgspenningsanlegg enn 30 meter, er anleggseigar – uavhengig av kven som utfører arbeidet – ansvarleg for at nettselskapet blir kontakta så tidleg som mogleg før arbeidet tek til. Nettselskapet vil gi tryggingsrettleiing og påvise minste sikre avstand til leidningsanlegg under arbeidet. Dersom tryggingsarbeidet fører til meirkostnader utover ordinær rådgiving og tilsyn for

nettselskapet, kan nettselskapet krevje at anleggseigar eller den som står for arbeidet, dekkjer desse kostnadene.

§ 3-8 Informasjonsplikta til anleggseigar

Anleggseigar har plikt til å varsle nettselskapet på førehand når det skal gravast, fyllast eller gjerast andre endringar i terrenget – sprenging, vegbygging, felling av tre – eller andre arbeid som kan skade eller på annan måte ha noko å seie for anlegget til nettselskapet, på grunn som anleggseigaren eig eller disponerer. Varslingsplikta gjeld uavhengig av kven som utfører arbeida, og nettselskapet skal varslast så tidleg som råd slik at nødvendige tryggingstiltak kan setjast i verk. Dersom tiltaka fører til meirkostnader utover ordinær rådgiving og tilsyn for nettselskapet, kan nettselskapet krevje at anleggseigar eller den som står for arbeidet, dekkjer desse kostnadene.

§ 3-9 Skade på eigedommen til nettselskapet

Anleggseigar er, i samsvar med alminnelege erstatningsrettslege reglar, ansvarleg for skade som er valda på eigedommen til nettselskapet. Dersom anleggseigar har unnlata å varsle nettselskapet i tilfelle som er nemnde i § 3-7 og 3-8, eller dersom varslinga kjem så seint at nettselskapet ikkje kan oppfylle rettleiingsplikta eller setje i verk eigna tryggingstiltak, blir dette normalt sett på som aktløyse som kan utløyse erstatningsansvar.

§ 3-10 Flytting eller fjerning av leidningar/nett

Dersom det er nødvendig – som følgje av offentlege påbod eller på grunn av behova til anleggseigar – kan stikkleidningar eller lågspenningsnett flyttast, endrast eller fjernast. Det same kan ein berre unntaksvis gjere for høgspenningsnett. Flytting føreset i alle tilfelle at dette kan gjerast utan vesentleg ulempe og utan kostnad for nettselskapet. Nettselskapet utfører normalt arbeidet med flytting, forandring eller fjerning av stikkleidning eller lågspenningsnett for rekvirenten si rekning.

Ved eventuell flytting, endring eller fjerning av høgspenningsanlegg på privat eigedom skal nettselskapet gjere dette for rekvirenten si rekning dersom ikkje annan avtale er inngått.

Nettselskapet har rett, men ikkje plikt, til å fjerne stikkleidningen og den delen av nettet som tener til forsyning av eit anlegg som har vore utan nettleigekunde i minst tre år. Nettselskapet skal skriftleg varsle anleggseigar før slik fjerning. Dersom nettselskapet

ikkje får stadfesting på framhald av tilknytning innan éin månad, det vil seie at det blir inngått ny nettleigeavtale for anlegget, kan nettselskapet fjerne dei aktuelle nettdelane. Nettselskapet kostar denne fjerninga.

§ 4 TILKNYTING

§ 4-1 *Tilknytingspunktet*

Tilknytingspunktet markerer overgangen mellom nettet til nettselskapet og det elektriske anlegget som er knytt til det. *Nedanfor er definerer vi grensa for eigedomsforholdet i tillegg til ansvaret for drift og vedlikehald.*

Nettselskapet kan definere tilknytingspunktet på følgjande måtar:

- ved punktet for føring gjennom veggen frå transformatorrom/nettstasjon
- det punktet i distribusjonsnettet der stikkleidningen er knytt til nettet
- tilkoplingsklemma på husvegg for luftnett eller grunnmur for kabel

I det siste tilfellet reknar ein stikkleidningen som ein del av distribusjonsnettet til nettselskapet.

Definisjonen av tilknytingspunktet og utføringa av tilknytninga skal som hovudregel vere i samsvar med standarden som nettselskapet har for området. Anlegget skal knytast til nettet på avtalt spenningsnivå. Tilknytingspunktet skal førast på skjema «Melding om installasjonsarbeid» eller anna skjema/melding som nettselskapet bruker for tilknytning.

Dersom stikkleidningen er ein del av distribusjonsnettet til nettselskapet, avgjer nettselskapet korleis stikkleidningen skal førast fram og plasserast, kva type han skal vere, og kva dimensjon han skal ha. Framføring av stikkleidningen blir utført i samsvar med reglane i § 3. Til kvart anlegg fører nettselskapet som regel berre fram éin stikkleidning.

§ 4-2 *Fysisk tilknytning*

Tilknytninga skal skje så snart som praktisk mogleg etter at anlegget er meldt ferdig, eller etter nærare avtale. Ingen andre enn nettselskapet eller representanten for nettselskapet har tilgang til å knyte eit anlegg til distribusjonsnettet. Urettmessig tilknytning av eit anlegg fører til erstatningsansvar og kan medføre straffeansvar.

Tilknytning skjer vanlegvis ikkje før eventuelt anleggsbidrag er innbetalt, eller etter at anleggseigar etter nærare avtale har stilt god nok trygd, jf. § 5, fjerde ledd.

§ 4-3 Anna utføring

Dersom anleggseigar ønskjer tilknytninga utført på annan måte enn det som er nettselskapet sin standard for området, kan nettselskapet utføre arbeidet etter bestilling og krevje at anleggseigar dekkjer eventuelle meirkostnader. Etter avtale mellom anleggseigar og nettselskapet kan arbeidet i tilknytingspunktet utførast av ein tredjepart som skal godkjennast av nettselskapet.

§ 4-4 Mellombels tilknytning

Nettselskapet kan knyte eit anlegg mellombels til nettselskapet sitt etter bestilling frå anleggseigar. Anleggseigar bestiller tilknytning på same måte som for permanent tilknytning. Bestillar betaler for framføring, montering, demontering og eventuelt vedlikehald av mellombelse låg-/høgspenningsnett før arbeidet blir sett i gang. Ved mellombels tilknytning kan nettselskapet og anleggseigar gjere avtale om at arbeidet i tilknytingspunktet skal utførast av ein tredjepart som nettselskapet godkjenner. *Før anlegget blir sett i drift, skal nettselskapet synfare og godkjenne arbeidet.*

§ 4-5 Tilknytingsgebyr

Nettselskapet kan i samsvar med offentlege forskrifter fastsetje at det ved nye tilknytningar eller oppdimensjonering av ei eksisterande tilknytning skal betalast eit tilknytingsgebyr. Gebyret skal i så fall leggjast på alle tilknytningar i konsesjonsområdet til nettselskapet. Gebyret kan differensierast, til dømes etter overbelastningsvern (sikringsstorleik).

§ 4-6 Endra systemspenning

Nettselskapet har rett til å endre systemspenning. I slike tilfelle skal nettselskapet koste den nødvendige omlegginga av anlegget til anleggseigar. Dersom anleggseigaren gjer ei anna oppgradering av anlegget sitt i samband med omlegging til ny systemspenning, vedkjem meirkostnadene for slik oppgradering ikkje nettselskapet.

§ 5 ANLEGGSBIDRAG

Nettselskapet har rett til å fastsetje eit anleggsbidrag for å dekkje kostnadene ved nye nettilknytningar eller ved forsterking av nettet til eksisterande kundar i samsvar med dei

lovene og forskriftene som til kvar tid gjeld, jf. § 17-5 i forskrift om økonomisk og teknisk rapportering mv av 11. mars 1999 nr 302.

Det kan bli kravd at anleggseigar betaler inn anleggsbidraget før arbeidet tek til. Ved eventuell avtale om betaling på eit seinare tidspunkt, kan nettselskapet krevje trygd for betalinga.

Permanent nett/stikkledning som er bygd eller forsterka i samband med tilknytning fram til tilknytingspunktet, er normalt eigedommen til nettselskapet, og nettselskapet har drifts- og vedlikehaldsplikt. Dette gjeld også dersom nett/stikkledning er heilt eller delvis finansiert ved anleggsbidrag.

Mislegald av plikta til å betale anleggsbidrag gir nettselskapet rett til å stengje eit tilknytt anlegg for uttak av elektrisk kraft inntil anleggsbidraget er betalt.

§ 6 MÅLEPUNKT FOR FORBRUKSMÅLING

Plasseringa av målepunkt blir avtalt i samband med bestilling av tilknytning. Normalt skal eit anlegg ha eitt (1) målepunkt som blir plassert så nært tilknytingspunktet som mogleg. Nettselskapet skal godkjenne plasseringa av målepunktet, og nettselskapet kan krevje at måleutstyret blir plassert utandørs i låst skap og/eller vere mogleg å lese av utanfrå. Nettselskapet skal elles til kvar tid ha uhindra og kostnadsfri tilgang til måleutstyret.

Ved tilknytning monterer nettselskapet, eller representanten for nettselskapet, måleutstyr for avrekning av nettleige og kraftlevering. Nettselskapet fastset storleik og type måleutstyr og eventuelle kontrollapparat m.m. Måleutstyr og kontrollapparat m.m. er eigedommen til nettselskapet, og nettselskapet står for nødvendig vedlikehald og bytte av målar.

Anleggseigar kan ikkje ta i bruk eit anlegg før måleutstyret er montert, eller anna er avtalt med nettselskapet.

§ 7 FRÅKOPLING OG TILKOPLING AV ANLEGGET

Fråkopling og tilkopling kan berre utførast av nettselskapet, representant for nettselskapet eller Direktoratet for samfunnstryggleik og beredskap (DSB) ved Det lokale

elektrisitetstilsyn (DLE). Nettselskapet og DSB/DLE er ikkje ansvarlege for skade eller tap ved frå- eller tilkoplingar som er heimla i denne avtalen.

§ 7-1 Fråkopling utan nærare varsel

Nettselskapet, DSB/DLE kople frå etter vedtak og utan nærare varsel dersom:

- anlegget er farleg
- det er behov for omgåande utbetring av anlegget
- bruk av anlegget kan medføre skade eller ulemper for nettkunden, nettselskapet eller andre

DSB/DLE kan etter forskrifter som er fastsette av Produkt- og elektrisitetstilsynet 6. november 1998 med heimel i *lov 24. mai 1929 om tilsyn med elektriske anlegg og elektrisk utstyr* § 2 kople ut eit forskriftsstridig anlegg dersom pålegg om utbetring av manglar ved anlegget ikkje er følgde til avtalt tid, eller dersom det ikkje blir brukt godkjende apparat.

§ 7-2 Fråkopling etter nærare varsel

Nettselskapet kan kople frå elektriske anlegg etter nærare varsel dersom fråkoplinga er nødvendig til dømes av omsyn til ettersyn, vedlikehald eller ved andre endringar eller utvidingar av anlegget til anleggseigar eller anlegget til andre nettkunder.

Nettselskapet skal, så langt det er mogleg, varsle nettkunden direkte eller på annan eigna måte om fråkoplinga. Fråkoplinga skal, i den utstrekninga det er mogleg, leggjast til tider som er til minst mogleg ulempe for nettkunden.

Nettselskapet kan dessutan etter nærare varsel kople frå elektrisk anlegg dersom nettselskapet ikkje får tilgang til anlegg, måleutstyr m.m. som nettselskapet etter tilknytingsvilkåra eller annan avtale har krav på tilgang til, eller dersom anleggseigar elles ikkje oppfyller pliktene sine i kontraktsforholdet.

Varsel om fråkopling vil ikkje seie at nettselskapet har plikt til å kople frå anlegget i heile eller delar av det varsla tidsrommet.

§ 8 ANSVARFORHOLD

§ 8-1 Direkte skadar og tap

Nettselskapet er berre ansvarleg for direkte skade og tap som tilknytninga av det elektriske anlegget til distribusjonsnettet eller regionaltilknytning er årsak til, når skaden eller tapet er valda på grunn av at nettselskapet har handla aktaust.

Nettselskapet er ikkje ansvarleg for skadar eller tap som kan oppstå ved rettmessig inn- og utkopling.

§ 8-2 Indirekte skadar og tap

Nettselskapet er ikkje ansvarleg for indirekte skadar og tap med mindre skaden er forårsaka ved forsett frå nettselskapet si side.

Som indirekte skade og tap (følgjeskadar) reknar ein blant anna:

- tap som følgje av at produksjon eller omsetning har minska eller falle bort (driftsavbrot)
- tapt fortjeneste som følgje av at ein kontrakt med tredjemann fell bort eller ikkje blir riktig oppfylt
- tap som kundane til anleggseigar/brukar har lide
- tap som følgje av skade på anna enn anleggseigar/brukar sine anlegg, apparat eller anna enn gjenstandar som har nær og direkte samanheng med den føresette bruken av anlegget eller apparata
- tap som følgje av brannskadar på bygningar osv.

§ 8-3 Medverknad frå anleggseigar

Dersom anleggseigar eller representant for denne har medverka til skaden eller tapet ved eiga skuld, kan ansvaret til nettselskapet bli sett ned eller falle bort, jf.

skadeserstatningsloven av 13. juni 1969 § 5-1.

§ 8-4 Tapsavgrensingsplikta til anleggseigar

Anleggseigar pliktar ved rimelege tiltak å prøve å avgrense tapet sitt. Forsømmer anleggseigar dette, må han eller ho sjølv bere den tilsvarende delen av tapet.

§ 8-5 Ansvar til anleggseigar

Anleggseigar er i samsvar med alminnelege erstatningsreglar ansvarleg for det tapet som hans/hennar bruk av nettet eller anlegget som er knytt til nettet, påfører nettselskapet eller dei andre kundane til nettselskapet og andre.

§ 8-6 Personskade

Ansvaret for personskade blir ikkje regulert av desse tilknytingsvilkåra. Det blir vist til dei alminnelege erstatningsrettslege reglane.

§ 9 ENDRING AV TILKNYTINGSVILKÅR

§ 9-1 *Endring av tilknytingsvilkår*

Nettselskapet har rett til å endre desse tilknytingsvilkåra.

Ved endring av desse tilknytingsvilkåra blir varsel om dette gitt som direkte melding til anleggseigar eller på annan eigna måte, til dømes ved kunngjering.

Endring av standard tilknytingsvilkår blir ikkje gjort gjeldande før tidlegast 14 dagar etter at melding er gitt. Så lenge tilknytninga består, er anleggseigar forplikta i samsvar med dei tilknytingsvilkåra som til kvar tid gjeld.

§ 9-2 *Endring av særskilt avtalte tilknytingsvilkår*

Eventuelt særskilt avtalte tilknytingsvilkår kan endrast på tilsvarande måte dersom ikkje anna er avtalt.

§ 10 TVISTAR

Tvistar i samband med tilknytingsvilkåra blir avgjorde av dei ordinære domstolane, med mindre partane i den enkelte tvisten er samde om at tvisten skal løysast ved skilddom og gjer avtale om skilddom.